

ALL NATIONS GOSPEL PUBLISHERS



www.anjp-hb.co.za



info@anjp.co.za

UMOYO WA MUNTU

Copyright ANGP

COPYRIGHT

ISBN 0 - 947052 - 06 - 2

ALL NATIONS GOSPEL PUBLISHERS
P.O. Box 2191, PRETORIA, 0001, R.S.A.
(A Gospel Literature Mission financed by donations)
(Reg. No. 1961/001798/08)

UMOYO WA MUNTU

PAMO

IGALASI LYA MUZIMU

(Ukufwanikizya nu Kubonesya mu Vituzituzi Teni)

Akabuku kano ni vituzituzi vyache kakanda mu France mu mwaka wa 1732. Kafumukizwe ukuba li “Galasi lya Muzimu” pamo “aKabuku ka Moyo”. Pa chifukwa cha bwanaloli bo kanyamuye ubwa mazgu gha Chala, nu bwiza bwache bonsi, kendite sona kachili kakwenda muneno inyinji izya muvysu vya Bazungu (Europe) na muvya baFirika muno. Kakubelengiwa na bantu bonsi aba nyitiko zya kupambanapambana.

Abinji babwaghania ubwanaloli bwa Lufingo lwa Chala ulwa mwibuku ikali ilya mwibangeli lo lwakwanilisiwa mwipy. “Nkuzukubapa umoyo umupya, sona nkuzukubika mumwinyu umuzimu umupya” (Ezekia 36 :26, baHeb. 8 :10).

J. R. GSCHWEND

Wensi yo akubomba imbibi bo akufuya ululaghilo papo ukubomba imbibi bo bufuya indaghilo.

Muzimene ukuti umwene witu akaboneka ukuti ize efye imbibi nukuti mumwache mute ububibi nabumo.

Wensi yo ali mumwache atakubomba imbibi, wensi yo akubomba imbibi bo atamwenizye lumo, nako kumumanya bo atamumenye.

Mwe banamwe, nayumo atakabapuvye, yo akubomba ingolosu bo mugholosu, ukuyana nukuti wepe mugholosu.

Yo akubomba imbibi bo wa satana, papo ukufuma ko kubwandilo, usatana akubomba imbibi. Chobene umwana wa Chala akinzila ukuti ize azinanganie imbonbo zya satana.

Wensi yo apapiwe nu Chala atakubomba imbibi, papo imbeyu ya Chala yili mumwache, sona atabaghiye ukubomba imbibi papo apapiwe nu Chala.

Momo tukubamanyila abana ba Chala na bana ba satana. Wensi yo atakubomba ingolosu sona atakughana uwamwabo bo atafumiye mwa Chala.

(1 Yoh. 3 :4-10).

UMOYO WA MUNTU

LITEMPELI LYA CHALA PAMO NYUMBA YO USATANA AKUBOMBELAMO IMBOMBO

(1 Yoh. 3 : 4-10)

Nkukulaba ukuti bo ukubelenga akabuku kano ukumbuke ukuti kali ngati ligalasi ilya kwiyenezyamo wemwene, nanti we wa panzi pamo we mukhristu, na linga ute nu lwitiko pamo ukunyokela kwisinda, pope inti wiyanie ngati mo uChala akuwenezya. UChala atakwenia ubuntu bwa bantu. Umwene akwenia mu myoyo ya bantu.

Usatana we wise wa bagulugulu bonsi, we mwene wa chisi, sona we chala wa chisu chino, yo akwiyandula ukuba mungelo wa buzelu. Abinji bakwiyandula ukuba batumiwa ba buzelu, popo bakukalala leka nanti akayilo kabu akenecho kavumbuka. Ukuyana na mutubalilo twakale, mumasiku ghilelo muli abatumiwa abinji leka abamyasi na babombi abagulugulu bo bakwiyandula ukuba batumiwa ba Khristu. Te chaķuswighisyha ha, papo nu satana akwiyandula ukuba mungelo wa buzelu (2 baKor. 11 : 13, 14). Usatana yo we chala wa chisu chino akubakupika abantu mumaso na munyinong'ono zyabo ukuti manyi beniange ulughano lwa Chala, ubukulu nabo busisa bwache; nukuti batakamweniange nu kumumanya umupoki wabo yo akabafwila, umwene witu uYeso Khristi (2 baKor. 4 : 4). Bonsi a babombambibi na basitalwitiko bafwe sona bafwamaso kumaso gha Chala. Bakulongoziwa nu muzimu wa chala wa chisu chino (baEfe. 2 : 2). Ba kulazya ku lufundo lwa bwila na bwila pene nanti amaso ghabo ghangighuka munzila yimo ukuti babwenie ubusobi bwabo. Yo akuti ate nimbibi bo akwizimbula "Pa chifukwa chinichi umwana wa Chala akaboneka ukuti ize ananganie imbombo zya satana" (1 Yoh. 3 : 8). "Mwipe kwa Chala. Mumukane usatana po azukubachimbila. Sengelela kwa Chala po wepe azukusengetela kukwinyu" (Yakobo 4 : 7, 8).

Bo ukubelenga akabuku kano nu kumanyila mu vituzituzi vyache, inti waghe ukuti ukwyienia mumoyo wako. Witikizye

ubuzelu bwa Chala bo bukwenia mosi na mosi bukulangizye mo umoyo wako ghubeleye. Uzyitike imbibi zyako, utakazikane ukuti zitalimo, papo amazyu gha Chala ghakunena ukuti, “Nanti tukuti tute ni mbibi bo tukwizimbula, nu bwanaloli bo butalimo mumyoyo yitu, loli nanti tukwilata imbibi zitu, umwene musibiliwa sona mugholosu, po akutuhobokela imbibi zitu nu kutusuka ku bubibi bonsi bo tulinabo” (1 Yoh. 1 :1-10). “Ibanda ly a Yeso Khristu umwana wa Chala likutusuka kumbibi zyonsi.”

Yo akukulamulila angaba we Chala sona angaba we satana. We muzya wa Chala nanti ha we wa satana. Nanti imbibi yikulambikite, utakakane ha, loli ukolele kwa Chala yo isenganizye ukukwabula mo mwa Yeso Khristu yo akiza pa chisu ichi ukupoka abambibi nu kunangania amaka gha satana na ghambibi zyo zitulambikite. Umwene yo bupoki bwitu. Uli pamaso gha Chala umuzelu, yo akwenia vyonsi ivya kubusyefu, inyinong'ono zyo zifisiwe ni mbombo zya mubumi bwako bonsi. Kwa Chala utangavwama, utangazifisa ni mbombo zyako kukwache, pakuti “Yo abikite ikutu, amwe atangivwa? Yo apelite iliso, amwe atangenia?”

“Amaso gha Chala ghakwenia uku nuku pa chisu chonsi ukwielangizya amaka ghache mubuyo bwabo imyoyo yabo yakufikapo kukwache” (2 Chron. 16 :9).

“Amaso ghache ghakuzyenia inzila zya bantu, ukwenia mosi mo bakwendela. Kutiliko ichisi pamo ichizyezye chamfwa umwakuti ababombambibi bangavwamamo” (Yobu 34 :21, 22).

“U Yeso atakibika nkani kukwabo papo akabamanya abantu bonsi” (Yoh. 2 :24).

Chobene, “Musayiwa yo ubunanzi bwache buhobokeliwe, yo imbibi zyache zikupikiliwe. Musayiwa yo uChala atakumubelengela ububibi bwache nayo mu muzimu wache mute akabugulu-gulu nakamo” (Masal. 32 :1, 2). (Ubelenge nu Masal. 51 wensi.) U Yeso nilelo achili akwitizya: “Za kukwane mwensi mwe mukutamiwa sona munyamuye iving'wamu, nkuzukubapa ubutuzyo” (Mat. 11 :28-30).

Ukulingania kwa mu Vituzituzi ICHITUZITUZI CHA BWANDILO


Ichituzituzi chino chikulangizya umoyo wa muntu umwanavuli pamo umukolo yo akwinong'ona vyo vyachisu, yo atakupinduka, po mwibangeli akuneniwa ukuba mubombambibi umwakuti akulamuliwa nu muzimu wa chisu ichi sona ni kwilu lya mibili ni vinyonywa vyache. Ichi cho chifwanikizyo cha moyo ukuyana namo uChala akuwenezya. Amaso gha dunukite nu kuchesama ukulangizya ubuching'wela ngati mo visimbiliwe Muvyili 23 :29-33: "Wenu yo ali nu mukosi? Wenu yo ali nu busulumanie? Wenu yo ali nu lombwa? Wenu yo ali nu kudinginyika? Wenu yo ali ni vilonda ivisita kumanyikwa? Bobala bo bakulinda mubwalwa, bo bakuyebela nu kulonda ubwalwa bwa kusangania. Utakabwenie ubwalwa po buchesamite, po bukulangala mwa komeji nu kufulukila mumo. Pabumalilo bukuluma ngati njoka, bukuluma ngati we chipili. Amaso ghako ghazukunyonywa abako abalendo nilomo lyako lizukunena vyo vitabaghiye."

Pansi pamutu muchituzituzi ichi, tukwenia umoyo wa muntu mo muli ivinyamana vyaluko nu luko, vyo vikulangizya imbibii zyaluko nu luko zyo zili mumoyo wa muntu, namanga umoyo buyo sona bwikazi bwa mbibi zitu. UChala akutubuzya ukwendela mwa Yeremia ukuti, "Umoyo mujanja ukulusya ivintu vyonsi sona mubibi wa kufikapo. Wenu yo angaghumanya?" (Yeremia 17 :9). UYeso umwenecho akwitikizya pavino niliyakuti, "Mumoyo wa muntu mukufuma inyinong'ono imbibii, ubuhule, ukughoghana, ukughonana, ubwiba, ubunyonywe, ububibi bonsi, utubini, amahelu, ukwikwezya, amadinko nu bukonyofu. Vyosi vinivi vikufuma mu moyo wa muntu nu kumunyazaya" (Marko 7 :21-23).

1. INKUKUTEMBO (Peacock) – Pobuli ubwiza bwa chiyuni ichi bukupaliwa na bantu bonsi, muno chikulangizya umoyo wa lwituvyo. ULusifara yo akaba mucherubu umwimikiwa nu kunyamula ubuzelu bwa Chala, nukuba mungelo wa Chala, akiza awa chifukwa cha lwituvyo, nukwipanga ukuba mulwani wa Chala yo tukuti usatana (Yes. 14 :9-17, Ezek. 28 :12-17).

Ulwituvyo lukufuma mu chiliba cha kunyanja ya moto po lukwilangizya munzila inyinji. Abantu bamo bakwituvya chifukwa cha bukabi bwabo, bamo ubumanyi bwabo, bamo imyenda yabo yo yafuma ukufika muyo bate ninsoni nu kulangizya imibili yabo, ukuvwala utwakwinozezya to tukung'алика, utubangeli, útwa mumakutu nu tunji, ngati mo visimbiliwe mwa Yesaya 3 :17-24. Bamo bakwituvizya abanyenza babo, uluko lwabo, ineno yabo, inyihoo zyabo ni nyangalo zyabo na mutuntu utunji nukuluvya ukuti "uChala akubapinga abamadinko nukuba nichisa kuba lwiyisyo" (1 Pet. 5 :5). UChala abenganite nu lwituvyo nu kwikwezya (Ivyili 8 :13). "Ukwikwezya kukwiza nu kunganika sona umoyo wa kughusa ghu kuwisya" (Ivyili 16 :18).

2. IMBWA – Yikulangizya ivinyonywa vy a mibili, ubuhule nu kughonana. Imbibi zino zyabala leka mutubalilo twa bumalilo tuno umwakuti tukwenela ukwitikizya ubwanaloli bwa mazyu gha Yeso gho akanena mumyaka 2000 yo yakinda ukuti mumasiku gha bumalilo muzukuba ngati mo mutubalilo twa Sodomu na Gomola. Umuzimu wa tubalilo tuno ghutakungiliye abamama na batata nu kwingila munkaya na mumasukulu gha chikhristu vyene ha, loli imbeyu imbibi ngati yino chachitima ukuti usatana mu buchevu bwache akuyipesa mu vituzituzi ivya kwenia, ukwenda mu mabuyo gha kutyongela, ukubelenga ivisita kubaghila, na munzila izyamwabo inyinji leka, po cho uChala akuti mbibi chikwitiziwa ukuba bumi bwa tubalilo tuno. Abalumendo na balindu abinji bakusendela mu vituzituzi ubumi bwabo poka na muvyakubelenga loli kubumalilo bakwagha bali nabo muntamyo na munsoni na mubumi ubusitakubaghila. Abantu ababibi nabo bakwenda mwalwe bo bakuchuka leka kubantu ba kabalilo kano. Inyumba zya kwimblamo zyaba mabuyo gha vinyali nkani. Abantu abakumanyikwa ukuba ba Chala ngati aba Yosefe (Ubwandilo 39) nabanji bate sona bakwenezyapo. Nu muntu uwabulo uwa chizulu yo wensi yo akoliwa mumpopo akamughogha angabamanyisya zimo abantu ba tubalilo tuno bo bakwienya ukuba ba mahala leka, sona angaya abalonge pisiku lya bulongelo. UChala akutubuzya ukuti manyi twangale nu kughonana loli tukuchimbile. Yonsi imbibi yo umuntu akubomba te yamubili loli bo bakughonana bakuyinangila imibili yabo.



1. UMOYO WA MUBOMBAMBIBI

“Mukutichi? Mutazimenye ukuti imibili yinyu matempeli gha Muzimu uMuzelu gho ghuli mumwinyu, gho mupokelite ukufuma kwa Chala, po te mwe binyu ha?” (1 baKor. 6 :18, 19). “Nanti yumo akulinyazya itempeli lya Chala isayiwa, uChala azukumupyuta wepe, papo inyumba ya Chala nswepu, inyumba yache yo mwemwe” (1 baKor. 3 :17).

3. INGULUBE – Yikunena ukuyana ni mbibi ya buchingwela nu bupafu. Cho chinyamana ichinyazu cho chikulya vyosi vyo **chavyagha**, ivyiza ni vibibi, ngati mo umoyo wa mubombambibi

ghukwitikizya bulo zyonsi inyinong'ono inyazu, imbombo imbibi, ivituzituzi ivibibi, ivya kubelenga vya bukonyofu nivinji. Umibili lyo nge litempeli lya Chala umumi ghukunyaziwa ni vintu ivibibi, ni nkalo inyazu ngati ukukweba itumba nako kufuna, ukukweba injemwa nu kubombela imilembo iyinji imikali. Inkalo ya kukweba itumba ni mphwani yakungilila abamama na batata ukulusya bwila. Ghene gho maka gha Chala gho ghanga-bula abantu bo bafuye chifukwa chitumba sona bazya ba satana. Abantu bakunyila ukukweba mwi tempeli mo bakwiputila papo bakuti bangaliywela, loli batakupasya ukunyazya imibili yabo ni chintu cho chikunka, yo gho matempeli aghenecho agha Chala. "Mutazimene ukuti mwe matempeli gha Chala, nukuti umuzimu wa Chala ghuli mumwinyu? Yo akulinyazya itempeli lya Chala, weyo uChala azukumupyuta, papo itempeli lya Chala lisayiwa lyo mwemwe" (I baKor. 3 :16, 17; 6 :18, 19).

Umuntu umupafu mubibi kumaso gha Chala. Tukulya ukuti tube nubumi, tutakubela nubumi ukuti tulyange. Inzala yiba-ghiye ukuzima nanti tungalya ivyakukwana, loli umuntu umupafu azukukolela bwile ukuti, "Vyize, vyize!"

Umupafu atakwikuta lumo, sona atakutingi lumo vyamfwana. Ukuyana nu lulaghilo Iwa mwa Tesitamenti Umukali, umuntu uching'wela nu mupafu bakasumbiwa na mabwe mpaka bafwe (Deut. 21 :18-21). "Uching'wela nu mupafu bazukuba bapina, utulo twabo tuzukubavwika utwasala. Yo akwenda numupafu bo akumukozya insoni uwise" (Ivyili 23 :21; 28 :7). Mukumbuke ukuti umuntu yumo umukabi, umupafu, umuzya wikkilu lyache akiza afwa, po bo ali mumayimba akinula amaso. Imbibi ya buching'wela te yakuyinena. Tumenye ko kupepula ivintu. UChala akutubuzya pa buzelu ukuti kataliko uching'wela yo angingila ku chinamwene cha kumwanya. Ubwalwa te chakulya ha, loli chakung'wa ichibibi cho chikupungania umwakuti bo bakolwa bakubomba vyo vitabaghiye. Bakubomba ivibibi, ba kukomana nu kughoghana vyo batangabomba nanti batang'welite. "Pakuti ubwalwa bu kusamula, ichakung'wa ichikali chikupenia: Bo bakuzimbuliwa nabo bate na mahala" (Ivyili 20 :1).

Bo bakwenga nabo bakughuzya ubwalwa bope bali ninongwa kwa Chala; papo uChala akuti, "Umukosi kubo bali namaka gha

kung'welela ubwalwa, nakubantu bo bakuba namaka gha kusanganizya ichakung'wa ichikali" (Yes. 5 :22). "Umukosi kwayo akumupa uwamwabo ichakung'wa, nu kumupa ibotolo, nu kumupangisya ukuti akolwe wepe" (Hab. 2 :15). Impiliti, ni banjo, nifyefye, nu malimba, nu bwalwa vili mu vyakusekelela vyabo, loli imbombo ya Chala batakulonda nu kuyikwanisya (Yes. 5 :12). "Mutakazimbiliwange, abahule, aba kwiputa ku vifwani, aba kwipoposya, abalyalya, nabo bakughonana pabana-vuli benebene, na biba, na balutotomelo, na ba ching'wela, na bantuko, na balombwa, te bakingile mu chinamwene cha Chala" (1 baKor. 6 :9, 10).

Imbombo zya mubili zili pabuzelu bulo, zimo zyozino: ukukwesiwa ku vibibi, ubunyazu, ukwibonesya, ukwiputa ku vifwani, ubulozi, ivyongo, ulombwa, utubini, ukufizania, ukupatunkana, ulutotomelo, ubuching'wela nivinji. Bo bakubomba vino te bakabe nubuyo mu bumwene bwa Chala (Gal. 5 :19-21). "Mutakakolwe nu bwalwa bukusobezya loli mwizule nu Muzimu uMuzelu (baEfe. 5 :18).

UYeso akubitizya bonsi abanyota akuti: "Nanti yumo ali ni nyota, ize kukwane ang'we amizi gha bumi ujnwkufwasa" (Yoh. 7 :37, 38). "Enia, mwensi mwe muli ni nyota, mwize kumizi, nayo ate ni ndalama, ize aghule nu kulya, mwe, ize aghule ubwalwa nu lukama ivisita ndalama nivisita kupima umutengo" (Yesaya 55 :1). "Wensi yo azukung'wanga amizi gho niza namupa te akabe lumo ni nyota, papo amizi gho niza namupa ghazukuba chifula chamizi ichakuswinya mumwache mpaka kubumi bwa bwila" (Yoh. 4 :14).

4. UKAYAMBA – Akunena nu bukata, ichizyela nu bulozi. Ukwilamwa kuli ngati mbibi ya bulozi. Ikwilu lya mukata likumughogha, papo inyobe zyache ukubomba zitakulonda. "Isiku ni siku akubanga akutotomela mu bupafu bwache" (Ivyili 21 :25, 26). UYoswa akabanga akubabuzya abana ba Israeli ukuti, "Mutakabange mwe bakata pa kufyula ichisu." Ubuntu bukata sona bwachizyela pakulondeleya ivya Chala. "Mwiyle pa kwingila pa mulyango umufinyu; chobene nkubabuzya nkuti bazukulondagha ukwingila loli bazukupotwa" (Luka 13 :24). "Yo akulondeleya yo azukuvyagha." "Ukfuma mukabalilo ka

Yohani umozyi uzukufika mu kabalilo kano, ubumwene bwa kumwanya bukulwiliwa po abamaka bo bakubufyula” (Mateyo 11 : 12).

Ubukata kuvya bupoki na kuvya muzimu bukututwalila ku bubibi. Bukutulesya ukwiputa nu kulondelezya ivya Chala, nu kupokelela ubukabi bwa mfingo zya Chala, nu kutunangania. Nanti uChala akunena kukwako, nu kukubuzya ukuti umupe umoyo wako lye lilelo, usatana akubuzya ukuti wize ubombe bunubu indabi pamo pisiku ilyamwabo lye lingabako, po ungaflwa kwambula mupoki sona kwambula Khristi. UChala akuti, “Nanti ilelo wivwa izwi lyache, utakakazye umoyo wako” (baHeb. 3 : 7, 8). Balinga bo bafwa bo bakubika ubupoki pisiku limo lye litakiza sona? Isiku lya ndabi te lyako ha.

Ichipapa cha kayamba abalozi bakuchibombela utubalilo utwinji mu milembo yabo, po muno chikulangizya imbibi ya kusubalila nu kubombela ivya bulozi nivya kulaghula mubuyo bwa kusubalila mwa Chala umumi. Tukubuziwa nkaninkani mu tubalilo twa mumabubinu, mu ntamyo na muvitima ukuti tukolele kwa Chala umumi, yo isenganizye ukutwavva, mubuyo bwa kusubalila mu mayele pakuti “Inyayo zya muntu umwiza zikulongoziva nu Chala” (Masal. 37 : 23). “Alipo yumo umubinu mumwinyu? Mubuzye itizye abasongo ba chipanga ukuti ba mwiputile nu kumupaka amafuta mwizina lya Yeso: Ulwiputo lwa Iwitiko luzukubapoka ababinu, nu Chala azukubapozya, nukuti nanti ame wambibi zizukuhobokeliwa. Muputilane nu kulatilana vyo mwanangilana ukuti mwize mupole” (Yakobo 5 : 14-16). “Ukukweziwa kutakufuma ku bufumilo pamo kubwingililo bwizuba pamo mumbali zimo mumo, loli uChala weyo akumanya” (Masal. 75 : 6, 7). UChala akababuzya abaku Israeli ukuti, “Mumwinyu mutakabonekepo nayumo uwakumupanga umwana wache umulumento pamo umulindu ukuti ende mumoto pamo ukuti aye pa kulaghula, pamo ukulotela ivya muntazi, pamo uwa kulalusya ku mizimu nu mulozi, nuwa mayele, nuwa kunena na bafwe, nuwa kwendela mu nkitwa. Pakuti bonsi bo bakubomba vino bakumukalalizya uChala” (Duteronomie 18 : 10-12). “Kunzi ku chinamwene cha Chala kuli abalozi, abahule, abaghoghi, aba kwiputa ku vifwani na bonsi bo bighanite nabo bakubomba

ubugulugulu” (Ubuset. 22 :15). “Te mukaye ku mizimu pamo kubalaghuzi ukuti mulalusye kukwabo, mubombe nabo imbibи nu kunyaziwa nabo. Ne Chala winyu” (Levit. 19 :31). “Nanti bayukubabuzyanga ukuti, Buka kuba nya mizimu na ku baghanga bo baku-laghula: Abantu baleke pakuya kwa Chala wabo? Baleke ku mumi baye kubafwe? Ukuyana nu lulaghilo namo nkusimikizizya: Nanti batakunena ukuyana nizwi lino, chifukwa chakuti mumwabo mute ubuzelu nabumo” (Yes. 8 :19, 20).

Bo ukubelenga akabuku kano, uChala akunena kukwako nu kukubuzya ukuti upinduke kumbibi zyako nu kumupa umoyo wako, loli umuzimu wa kayamba gho ghuli mu moyo wako ghukusakizya izi nizi ukuti wize wipe kukwache muñtazi nu kwizuzya ubogha mu moyo wako. Abantu bazukunenachi ku-kwane, nga abamanyani bane ni chisu, kuzukuba bulibuli nanti naba ne mukhristu umwenecho? Ningiza nikale bulibuli kwa-mbula ba dansi, kwambula kuya mu vyakunozya na muvya ku-hbosya ichisu? Mubuyo bwa kwenia ubukabi ubusita kuneneka ubwa mwa Yeso Khristi, umutende wache, ulusekelo lwache, ubuchindamu bwache, ubumi ubusita kumala ubwa lusekelo, ukwanda ukwenia ivintu vyonsi vyo inti upulusye pamo tuti vyo inti uvileke nanti wamwitikizya uYeso Khristi ukwingila mu-moyo wako, pobuli ukunyila umuntu nimfwa kuchili kukukungi-liye kwa satana. UYeso akiza pa kwabula bonsi bo bo bakunyila imfwa, bali bazy a mubumi bwabo bonsi (baHebri 2 :14, 15). Umuzimu wa chizyela ghu kukazya umoyo wako mpaka ghukale ngati chipapa cha fulu kayamba.

5. UZYELA – Chinyamana ichisisya sona ichikali. Ulubengo, ilaka ni lyoyo utubalilo utwinji vikulamulila mu moyo nu kupa-ngisyu abantu ukughoghana. Ungayezya leka ukwikola ilyoyo lyako loli pope likwizukufuma nu bukali bwache bonsi. Chizapo ukuti witike bulo ukuti lili mu moyo wako nu kumulaba uYeso Khristi ukuti akwabule. “Mumaso ghako mutakabe ubukalale nabumo” (Ubwandilo 45 :5). “Nyokako ku bukalale nu kulikana ilaka, mutakibike ukubomba ichibibi napo panandi” (Masal. 37 :8). Ilyoyo likuteneka nubukali bukupenia, loli wenu yo angima ku kabini?” (Ivyili 27 :4). “Efya ilyoyo mu myoyo yinyu pakuti ilyoyo likukunta mu vifuba nya balunkanu” (Mulumbilili

7 :9;11 :10). “Mubutaye ubukalale bonsi” (baKol. 3 :8).

Abinji abogha ba kung’wela ukuti baye babombe ivibibi pamo baye balifye, loli “Ubwalwa bwabo nsalile zya njoka sona nsalile inkali izya chipili” (Deto. 32 :33). Ukulifya ku kuhobosya ku wambibi, loli uChala wa kutulifizya. UYeso akati, “Ughane uwamwinyu ngati mo wighaniye.” Sona “Ughane abalughu bako.” UChala akulaghizya uluhobokelo ku mbibi zitu nanti tukuhobokela bo bakutunangila. Umuzimu wa kudinginyika nuwa kukalalila mukasi mubibi kumaso gha Chala. Inkalo imbibi iyabwite niya kukupula ibanda vili mumoyo wa muntu, chocho chifukwa umutende uwenecho ghu kwenela ukwandila mu moyo nanti wakuti wendelele.

6. INJOKA – Yikazimbula uEva nu Adamu mu mughunda wa Edeni nu kupalaghania ulwivwano lo bakaba nalo nu Chala. Usatana, umungelo yo akawa, akabini kakamukola bo enia ukuti uAdamu nu Eva baba ~~balongozi~~ pa chisu chosi nu kwivwana nu Chala, ukusenda ubuyo bwa Lusifala. Mukabini kache, usatana akabinong’onela ukubamaliziza papo loli akakwanisa ko kupalaghania ulwivwano lo lukabapo nu Chala. Umuzimu wa busatana uwakabini nu bunyonywe mumoyo wa muntu ghuchili ghu kunangania ubuhobosu bwa bantu po bakwenia abamwabo bafwasite nu kwikala akiza. “Akabini kabibi ngati lipumpa” (Inyimbo zya Sol. 8 :6). Kakwiza ni nyinong’ono imbibi mu moyo ukuti ubufwase bwa banji ghu palaghanike, umwakuti kakupangisya nu kughoghana. Ichi chikuboneka nkani mubo basendite. Mu buchuluzi na muvyamwabo kakupangisya ulubengo nu busulumanie. Na babombi ba chikhristu, abalumbilili na badimi, bataponite ku bulughu bunubu, po nanti bąkwenia ukuti uChala akubombela umubombi wache yumo ukubalusya. Bangyania nanti bakuba maso bwile nu kwizula nu lughano lwa Chala lo lukwiza mu moyo nu Muzimu uMuzelu, ukuti ububombeli bwabo kwa Chala butakanangike nu muzimu bwa busatana ubwa kabini.

7. UCHULA – Ukuyana nukuti akulya itope, muno akunena ni mbibi ya bupafu nu lughano lwa ndalamu lo bobwandilo bwa

bubibi bonsi (1 baTim. 6 : 10). Abachula bamo mu Kongo ukubenianga bakulya imbebe zyo nyinji mpaka bikute, bapunte nu kufwa. Umuntu umupafu atakutosya lumo inyobe ukuti avwe abapina na bapotwe, loli akuyezza munzila zyonsi, inyiza ni mbibi, ukuti abunganike nu kukaba ichuma cha pachisu pano po uluswa nu lusima vikwiza vinanganie kubumalilo. UYeso akati, "Manyi mwilundikile ichuma pachisu, po uluswa nu lusima vikunangania, sona po abiba bakupangula nu kwiba: Loli mwilundikile ichuma kumwanya, ko ulusima nu luswa vitanganangania, sona ko abiba batanga pangulania nu kwiba, pakuti ko ichuma chako chili koko numoyo wako ghuliba" (Mateyo 6 : 19-22). U Akani ni nyumba yache yonsi bakafwa chifukwa chakuti aka-ghana ugolide nu siliva nu tumabwe twa mutengo ni myenda (Yoswa 7). U Yudasi uwa ku Karioti, umutumiwa wa Yeso, akiza ikunga chifukwa chakuti ulughano lwa ndalamu lukamupangisya ukuti amukolesye umwene nu bwana wache. Indalamu te mbibi ha, sona ichibibi te we golide ha, loli ulughano lwa ndalamu lo luli mumoyo wa muntu.

Abanavuli na bakolo aba vigabo vya kupambana nabanko zyakulekana bakomania imyoyo yabo riya mbumba zyabo chifukwa chikwilu lyakuti bakabe lubilo ukwendela munjuga zya ndalamu, ukubika indalamu inyinji ukuti bapotane pa kuchimbila nu kuchimbizya injinga, impunda, nimbwa, etc. Ikwilu lya kukaba lubilo kwambula kutamiwa likuleta ubwiba, ukughoghana nu kwikunga. Ulughano lwa ndalamu nu bupafu vili na bamanyani abinji leka ngati: Ukughana ukuchuka, ukuba namaka nanti popandyali ukuti ube we mulongozi pabamwinyu, pamo pa ndalamu ukuti ukanyilile abapina, pamo mu chipanga, ukwipa leka kwizina lya chipanga ukulusya kwa Chala nu kuywelula wensi yo akwipa kwa Yeso kwambula kukonka ivya chipanga (Marko 9 : 38). UYeso akati, "Muchebechebe sona mubemaso ku bunyonywe: Pakuti ubumi bwa muntu butakubonekela muvyo ali navyo" (Luka 12 : 15). Akapangwi ka muntu umukabi kakuti: "Umughunda wa muntu yumo umukabi ghukela leka. Po aki-nong'ona mumoyo wache ati: 'Inti imbombechi ponte nubuyo ubwakuti ningasungamo vyosi vino?' Po akati, 'Inti imbombe chino, inti imvongolanie ingazya zyo ndinazyo nu kuzengapo inkulu umwakuti insungemo vyo navuna poka nu katundu wane.

Po nkwickuti ku moyo wane: moyo wane, uli nivintu ivyinji vyasenguliwa kumyaka imingi; tekania, ulye, ung'we sona uho-boke.' Loli uChala akamubuzya: Wechilunkanu, ubusiku bunubu umoyo wako nkughulonda: Po ivintu vyonsi vinivi vizukubanga vyawenu, vyo wiyla nu kusunga? Momo abeleye yo akwisungila ubukabi bwachisu loli kwa Chala te mukabi" (Luka 12 : 16-21). "Chingamwawachi umuntu nanti akaba ichisu chosi nu kupulusya umoyo wache?" (Marko 8 :36). "Mutakinong'one nkani nivya bumi bwinyu, vyo inti mulye, pamo ivya mibili, vyo inti muvwale ... Loli mulondeleye ichinamwene cha kumwanya, po vyosi vinivi vizukongeleziwa papinyu ... Pakuti ko ichuma chako chili koko nu moyo wako ghuzukuba" (Luka 12 :22-24).

8. USATANA – We wise wa bagulugulu bonsi nabo bakunena ubumyasi, weyo apelite imbibi pa bantu bonsi sona weyo mulo-ngozi wa moyo. UYeso akati, "Mwe baghuso usatana po ivya ghuso vyovyo mukubomba. Ukwanda ku bwandilo mughoghi chobene atimite lumo pa bwanaloli pakuti mumwache mute ubwanaloli nabumo. Nanti akutamanta bo akunena cho chache: Pakuti mugulugulu sona we wise wache" (Yoh. 8 :44). Akabujanja kanandi kayanite bulo nu bujanja ubukulu. Ubujanja bulipo bukuneniwa, bukusimbiwa sona bukubombiwa. Umuzimbuliziyi mumyasi pakuti ubwanaloli bwakuti akwibika mo atabeleye. UChala atangatamanta – nu mukhristu bulo (Tito 1 :2). "Nanti tukuti tuli mumwache po tukwenda muchisi bo tukwizimbula, nu bwanaloli bo bute mumwitu" (1 Yoh. 1 :6). "Pakuti kunzi kuli imbwa, abalozi, abahule, abaghoghi, abakwiputa ku vifwani na wensi yo ighanite nayo akupanga ubumyasi" (Buset. 22 :15). "Uchala abenganite nu kamboni umugulugulu nayo akutamanta" (Ivyili 6 :19).

9. ULUTONDWA – Lukunena nu kwilonga kwa mumoyo wa muntu wensi. Muno kwanyaziwa, lumo kungaba kwafwa chifukwa cha kubomba imbibi pipipi umwa kumanyamanya, kwa kupikiliwa nu kupuviwa umwakuti kutanga zyaghania ni mbombo zyache bulo. Ukwilonga ukubibi kunuku kungapuma sona kwize kuyimbe. Kukususya ponge kukuhobokela nu kuhobokela ponge kukususya. Kungaba kwapembiwa ngati chela ichipyе nu kuleka

ukwikola bo kukwepukako ku lwitiko nu kwivwila imizimu ya kunyofya ni vimanyisyo vya satana nu kutamanta umwa kuvwamilizya (1 baTim. 4 :1, 2; baHebri 10 :22).

10. ILISO – Iliso lya Chala likwenia vyosi vyo vikubombiwa mu moyo. Nachimo chitangavwama kwiliso lyache ilyakwaka, avimenye nu kuvyenia vyosi vyo tukwinong'ona navyo tukuti tubombe kubusyefu. Kali ukubomba ivibibi mo muchisi leka, mumpanya leka, mu chiliba ichitali leka pamo kosi ko ungaba, uChala akukwenia. (Iliso mu vituzituzi vino likukolelana namo pamaso pabeleye.)

11. INDIMI ZYA MOTO – Zya zyungulila umoyo ukulangizya ulughano lwa Chala kwa muntu wambibi. Pobuli uChala ayibengite imbibi, amughanite leka umuntu umwakuti atakuyilonda imfwa ya wambibi, loli ukuti apinduke abe nubumi. Ichi-mwemwe chikulu leka kumwanya pa mubomba mbibi weka yo apinduka. Indimi zya moto zikunena sona nibanda lya Yeso Khristi “ing’ozi ya Chala yo yikwefya imbibi zya chisu.”

12. UMUNGELO – Akwimilila izwi lya Chala. UChala akulonda ukunena **kwa mama** nu tata yo azimbuliwe nu kupuviwa nu kwizulana **ni mbibi**; ukuti apinduke nu kwitikizya ubuzelu nu lughano lwa Chala vyingile mu moyo wache.

13. INKUNDA – Chifwanikizyo cha Muzimu uMuzelu, u-Muzimu wa bwanaloli gho ghukubonesya imbibi, nu bwanaloli, nu bulongi. UMuzimu uMuzelu ghuli kunzi kwa moyo wa muntu. Ghutangikala mo imbibi yikulamulila.

Nanti ichituzituzi chino chikuyana nu moyo wako, kolela kwa Chala, wighule umoyo wako nu kwitikizya ubuzelu bwizwi lyache bulamemo. “Subila mwa Yesu Khristi po uzukupokiwa.” UChala ipiye leka ukuti angawandula umoyo wako nu kukupa umoyo umupya nu muzimu umupya. Ichi twa chilingania mu chituzituzi cha bubili.


ICHITUZITUZI CHA BUBILI

Ichituzituzi chino chikulangizya umoyo wa kupinduka nu kulondelezya uChala. Umungelo alemite ichilwilo, Izwi lya Chala Iyo, “likwendelezya sona lyamaka nukuba lisongozu ukulusya ichilwilo ichisongozye ndwima, likulasa nu kudumulania mu-moyo na mumuzimu namu tumpulung’nyu, nu kuzyaghania inyinong’ono zya mumoyo navyo umuntu akulonda ukubomba” (baHebri 4 : 12). Izwi lya Chala likumukumbusya ukuti “Amalipilo gha mbibi mfwā,” nukuti “Chipegawai kwa muntu ukufwa lyoka, ukufuma apo kulongiwa” (baHebri 9 : 27). Ubumalilo bwa wambibi nuwa lukani yo nyanja ya moto yo yikwaka ni nkala-kasya.

Munyobe iyinji umungelo alemite ichimutu chamufwe. Ichi cha kumukumbusya uwambibi ukuti twensi swe bakufwa. Imibili yitu yo tuyighanite leka, tukuyivwika nu kuyilisyā, nu kuyiswefya nu kuyisungilila, nu kuyikusya kunzala na kwikwilu lyache, yizukufwa nu kubola, insomi zizukuyilya loli imyoyo ni mizimu yitu yizukwikala mubumi bwa bwila nu kulindilila ukubonekela pa chitengo cha bulongi icha Chala.

Apa tukwenia uwambibi anda ukukonka izwi lya Chala nu kwighula umoyo wache ku lughano lwa Chala. UMuzimu uMuzelu wanda ukulama muchisi cha moyo wambibi. Ubuzelu bwa Chala bwingila mwitempeli lyache nukwefya ichisi chonsi. Nanti ubuzelu bwa Chala bukwingila, ichisi chikwenela ukuchimbila. Ivinyamana, vyo mbibi, vikwenela ukuchimbila.

Polelo kwa we mubelengi, mwitikizye uYeso yo buzelu ingile ukuti ichisi cho yo mbibi chifume. Umwezi ni ntondwa vingatulamyako mibusiku bwachisi, loli nanti izuba lyafuma, ichisi nu tubuzelu utunandi vikufumapo. UYeso lizuba lya bwanaloli. Bo ingila mwi tempeli ku Yerusalem, akabefyamo bonsi bo baka-ghuzyanga ing’ombe, ing’ozi ni nkunda nu kuzisasya indalamā, nukuti, “Chisimbiwe, inyumba yane yizukwitiziwa ukuba nyumba ya kwiputilamo, loli mwayipanga ukuba mpako yabiba” (Mat. 21 : 13) Umoyo wako ghukapangiwa ukuba nyumba ya Chala, itempeli lyache. Akulonda ukwikalamo nu kughuswefya nu kwi-



2


2. UMOYO UWA KULASWA NUKWIPA

zuzyamo ubuzelu, nu lughano, nu lusekelo. UYeso atakizila ko kutuhobokela ku mbibi zitu ha, loli akiza napa kutupoka nu kutwabula ku maka na kubuzya bwa mbibi. “Nanti Umwana (uYeso) iza ababula, po muzukuba naloli mwe babuke” (Yohani 8 :36).

ICHITUZITUZI CHA BUTATU

Ichituzitzuichi chikulangizya akabele ka moyo wa muntu yo naloli apindukite. Andukwenia ubukulu nu bubibi bwa mbibi zyache zyo u Yeso akazifwila pa mpinjika. Bo akuyenia impinjika yo umungelo akumubonesya ukwendela Mwizwi lya Chala, vikumulasa mu moyo wache nu kumupa ichitima ichikulu ukuyana ni mbibi zyache. Bo akwenia ulughano ulukulu ulwa Chala lukubonekela mwa Yeso Khristi, ulughano lunulu lukusunkunia numoyo wache bo akuzyaghania ukuti u Yeso Khristi, umwana wa Chala, akiza pakwefya imbibi zyache inyinji bo akwipa ukufwa mubuyo bwache pikwi ilya kughuniwa.

Ubwanaloli ubwakuti u Yeso akakomiwa nu kuvwikiwa impumpu ya mivwa, imisumali imukulu imisisya yakomeliwa munyobe namu vinama nu kufwila pa mpinjika chifukwa cha mbibi zyache, bwaboneka nu kumwingila umupinduke kumbibi nu kumwandula mu moyo na mubumi bwache. Bo akubelenga mwizwi lya Chala mo akwyenia ngati po pigalasi, andukuzyaghania nkani mo asobeleye bo akuchizania indaghilo zyache. Ichitima ichikulu icha mwa Chala chikumwizula, po bo akwipa umoyo wache kwa Chala umwa kulila kwa masozi, u Yeso aku-sengelela kukwache, ulughano nu mutende wa Chala vikwingila mu moyo wache bo akuzyaghania ukuti "**Ibanda lya Yeso Khristi umwana wa Chala, likutusuka ku mbibi zyonsi**" (1 Yohani 1 : 7). U Yeso ali kupipi nabo balaswa mumoyo nu kubapoka nabo bali numuzimu wa kupinduka kwa bwanaloli" (Mas. 34 : 18). Izwi lya Chala likunena, "Kwa muntu uyu ko nkuzukwenia, nakwa mupina uwa kupinduka mu muzimu nu kutetema pizwi lyane" (Yes. 66 : 2). UMuzimu uMuzelu ghu kumuteketela amazyu gha Yeso, "Mulumendo (mulindu), zala bulo, imbibi zyako zyahobokeliwa." Bo achili akwenia ku mpinjika na kwibanda lya Yeso lio likakupuka pa mpinjika, nu kusubila ukuti vyonsi vinivi vikabombiwa chifukwa cha yuyo, andukuzyaghania ukuti ukatundu wambibi epusiwa, pakuti u Yeso anyamula ivyakubaba poka ni vitima vitu, nukuti "Akavulaziwa chifukwa cha bunanzi bwitu nu kukomiwa chifukwa cha mbibi zituzi," nukuti "uChala amutwika ububibi bwitu bonsi" (Yesaya 53 : 5).



3. UMOYO WA KUPINDUKA

UMuzimu uMuzelu nu lughano Iwa Chala vyizula mumoyo umusuke. Bo akwenia kumpinjika nakwa Yeso mu lwitiko, andukuzyaghania ukuti imbibи zyache zya hobokeliwa nukuba nu bwanaloli mu moyo wache ukuti ibanda lya Yeso Khristu umwana. wa Chala, lyamusuka ku mbibi zyonsi (1 Yohani 1 : 7). Aba nu bwanaloli ukuti wensi yo akusubila mumwache te akalongiwe, loli aliba nu bumi bwabwila (Yoh. 3 : 16). Pakuti

mwa Yeso “tuli nu bupoki ukwendela mwibanda lyache, nu luhobokelo ku mbibi, ukuyana nu bukabi bwa chisa chache” (baEfe. 1 :7). Ikwilu ibibi ilya mubili lya pyaniziwa ninzala inkulu iya Chala niya kumubombela “yo akanda atughana.” Mubuyo bwa kughana ichisu ni vintu vya muchisu, amughana uChala nivintu vya Chala.

Chobene mu chituzituzi tukwenia ivinyamana vyo vikulanngizya imbibibi vili kunzi ku moyo wache pobuli usatana akwila lamwa pakwepa mu bwikazi bwache ubukali nu kuchebela kwisinda ukuti pamo angapagha apa kwingilila sona. Chobene umwene witu uYeso Khristi akutusoka ukuti tube maso nu kwiputa, ukuti tumukane usatana po wepe azukutuchimbila.

ICHITUZITUZI CHA FOLO

Chikunena nu mukhristu yo awagha umutende uwenecho poka nu bupoki chifukwa cha kwipa kwa mwene sona umupoki witu uYeso Khristi. Po atakughusila nachimo ichinji “yene yo mpinjika ya mwene witu uYeso Khristi, moyo ichisu chikome liwe kukwache nayuyo ku chisu” (baGal. 6 :14). UYeso akafwa pa mpinjika ukuti nuswe “tufwe ku mbibi nukuba bumi ku bwana loli” (1 Petro 2 :24); ukuba bakhristu aba kukomeliwa ku chisu.

Tukubuziwa “ukwenda mu muzimu ukuti tutakalikusye ikwilu lya mubili (baGal. 5 :16, 25). Ipanda lyo baka mukungilapo uYeso bo bamuvula imyenda lili mu chituzituzi chino poka nindisa ni fyazu zyo bakamukwapulila. Akakwapuliwa pa mbibi zitu pakuti “ulufundo lwa mutende witu luli papache.” U Herodi na bantu bache bakamobezya, nabo bamuyivya, bakamuvwika impumpu yamivwa pamutu wache – mubuyo bwa mpumpu ya golide, nu kumulemeka akatete kunyobe ya ndilo – mubuyo bwa ndisa ya bumwene, bakamufughamilila nu kumobezya, bat, “Tukwenie mwene wa baYuda!” Baka mufwinila amati nu kumufyula itete nu kumukoma nalyo pamutu. Bo bamuywelula nu kumobezya nkani, bakabuka nawe pa kumukomela.

Abinji abakhristu pobuli bakuya pakwiputa nu kupokela ivyikemo nu kwimba inyimbo zya Chala, mumbombo zyabo imbibibi

Akomeliwe poka nawe
baGal. 2 : 20

Ufuye po ubumi bwako
bufisiwe nu Yeso mwa
Chala baKol. 3 : 3

Tufuye kumbibi loli swe
bumi kwa Chala mwa
Yesu Kristi
(baLoma 6 : 11).



4. UKUKOMELIWA POKA NU YESO

bachili bakumukomela sona umupoki wabo. “Te wensi yo akuti mwene, mwene inti akingile mu bumwene bwa kumwanya, loli mwene yo akubomba ubwighane bwa Tata wane yo ali kumwanya” (Mat. 7 : 21-27).

Muchituzituzi chino muli ichola cha ndalama icha Yudas, yo akamukolesya uYeso Khristi nu kumughulizya nu twasiliva sate, chifukwa ulughano lwa ndalama luka kungilila umoyo wache nu kumukupika inyinong'ono. Ichikozyo, umunyolo, etc. vyovyo abasikali bakabombela bo bakumukola uYeso nu busiku. Injuga, yo bakubombela ku ndalama, abasikali ba kayibombela bo baku-

panga amaele pa myenda yache, kuno bakukwanisya vyo vikaneniwa kale “Amalaya ghane bakagabana loli pa myenda yane bakapanga amaele” (Mas. 22 :18). Vyosi ivya Yeso bakafyula, loli umwenecho bamukana, bati “Tutakulonda ukuti angatulongozya umuntu yuno.”

Abantu bakulonda he ukuti bangapokela insayo ukufuma kwa Chala, imvula na kasanya, loli batakulonda ukwipa ku bulongozi bwa Chala. Kubinji, uChala akulondiwa ko kwawwa mu ntamyo na mubupotwe.

Abasikali bakamulasa kulubazu lwache na kumoyo ukubombela impalala, “po kukafuma ibanda na mizi” (Yohani 19 :33-37). Bo umukolwe atalilite, uPeteli a kamukana uYeso katatu. Loli akiza apinduka nu kulila nkani. Ukulangizya ukuti we wa Yeso mumazyu na mu mbombo zyako? Pamo uli ninsoni kubantu? UYeso akati, “Wensi yo akunitika pa bantu, nune inti nkamwitike pa Tata yo ali kumwanya. Loli yo akunkana pa bantu, wepe nkuyumukana pa Tata yo ali kumwanya” (Mateyo 10 :32, 33).

U Yeso akanena sona, “Wensi yo atakunyamula impinjika yache nu kunkonka atanjaniye” (Mat. 10 :38). Basayiwa bo bakwima pwie, uYeso Khristu.

Libwe lya bwile, imvwamemo,
Amizi nibanda ivyakufuma
Mulubazu lwako, vimpoke ku mbibi,
Vinkazye nu kumpa amaka

ICHITUZITUZI CHA FAIVI

Chikulangizya umoyo umuswefye sona umusukiwe uwa muntu wambibi yo apokiwe mu chisa namu lughano lwa Chala. Lyaba litempeli ilyenecho ilya Chala; bwikazi bwa Chala uWise, nu Mwana nu Muzimu uMuzelu, ngati mo uYeso akunenela, “Nanti umuntu anganite, inti asunge izwi lyane: Po nu Tata azukumughana, tuzukwiza mu mwache nu kwikala nawe” (Yohani 14 :23). UChala akuchindika nu kusaya nu kukwezya umuntu ukwendela mwa Yeso Khristi (Luka 1 :52).

Umoyo lyaba litempeli ilyenecho ilya Chala. Imbibi zyepu-

kamo. Mubuyo bwa minyamana iya satana, uwise wa bujanja, tukwenia uMuzimu uMuzelu, uMuzimu wa bwanaloli wikaye mu moyo. Mubuyo bwa kuba bwikazi bwa mbibi, umoyo lyaba likwi ilyiza ilya kwela, pamo mughunda wa kupapa imbeyu zya Muzimu ngati ulughano, ulusekelo, umutende, ulwiyisyo, uku-jimba, ubufisa lyoyo, ubwiza, ulwitiko, umuchizi, ukwilema, nivinji vyo vikuhabosya umuntu nu Chala. Ilelo aba chibyaliwa ichinyami nu kupalika mwa Yeso Khristi. Ubunyami bunubu bufumiye apakuti ali mwa Yesu Khristi, nu Yeso nizwi lyache vili mumwache (Yohani 15 :1-10). Pakuti oziwe nu kwizula nu Muzimu uMuzelu, ali na maka gha kupotela umubili ni vinyonywo vyache, nu kumukomela umuntu umukali. Akwenda mu maka agha Muzimu uMuzelu nu kughupota umubili. Atakwikalila sona muvyo akwenia nu kwivwa pamo ukuvipima, loli mu lwitiko – chifukwa ulwitiko mwa Yesu Khristi ko kufosya kwa kuchipotela ichisu. Achili akudaga chifukwa cha lwitiko mwache ulwa kwiza kwa mwene witu uYeso Khristi ko kupala-miye leka. Akwikala mu lughano lwabwile ulwa Chala.

“Basayiwa abaswepu mu moyo pakuti bazukumwenia uChala” (Mateyo 5 :8). UDevedi, pobuli akaba we ḥwene umukabi leka sona nukubafosya abalwani bache, akamanya ukuti ubwite ubwenecho bukaba mumoyo wache, pobo iyaghania ubupotwe bwache, akiputa, “Upele umoyo umuzelu mumwane, we Chala, nu kumpa umuzimu uwenecho” (Masal. 51 :10). Nayumo atangisuka mu moyo wache pamo ukwipela umoyo umuzelu, pene nanti angapinduka naloli nu kwiza kwa Chala ngati mo uDevedi akabombela, nu kumulaba uChala ukuti amupelele umoyo umupya.

U Chala akulonda ukubomba ichintu ichipyा mumwako. Ukuvwala utwasala twa bwiza ubwakwipa nu kusubalila mu výabulo te kupange umoyo wako ukuba bwikazi ubwenecho ubwa Chala. Akulonda he pakuti angakwawwa pakuti weyo akuti, “Nkuyunyafila amizi amiza papinyu, po muzukuswepa: Nkuzukubaswefya ku bunyazu bwinyu bonsi naku nyiputo zya kuvifwani. **Nkuzukubapa umoyo umupya, nkuzukubika nu muzimu umupya mumwinyu: Nkuzukwefya umoyo wibwe mu mubili winyu nu kubikamo umoyo wa mubili. Umuzimu wane nkuzu kughubika mumwinyu** nu kubapanga ukuti mwende mu masimbo ghane, po

Ulughano
Ulusekelo
Umutende
Ulwitiko
baGal. 5 : 22, 23

Ukwiyisya
Ubwiza
Ukujimba
Umuchizi
Ukwilema



5. ITEMPELI LYA CHALA

muzukusunga vyo nanena nu kuvibomba" (Ezek. 36 :25-27). Ichi chocho Utesitamenti Umupya akung'anamula yo uChala amatiliye nibanda lya mwana wache uYeso Khristi.

Muchituzituzi chino tukwenia umungelo papipi. Abangelo ba bikiwe ukubabombela bala bo bayukwingila mubumi bwa bwila, nu kusungilila bala bo bakunyla uChala (Masalmo 34 :7; 91 :11; Danieli 6 :22; Mateyo 2 :13; 13 :39; 18 :10; Imbombo zya Bat. 5 :19; 12 :7, 10).

Usatana wepe ali kupipi nu moyo ngati po akwenia nanti aka-lusako ka kwingilila sona mu bwikazi bwache ubukali kanga-boneka. Chobene tu kusokiwa ukuti tubemaso nu kwiputa pakuti "Umulwani witu usatana, ngati nkhalamu yo yikubuna, akwenda-kwenda uku nuku, ukulonda uwa kulyewa" (1 Petro 5 :8). Utu-balilo utwinji akwiza ngati mungelo wa buzelu nu kupuvya ababombi bo batemaso nu bunyonywe bwavya muchisu chino, u kuyezya, mu buchevu bwache, ukupuvya bo bipiye. Loli nanti tu kumukana usatana, azukutuchimbila (Yakobo 4 :7).

ICHITUZITUZI CHA SIKISI

Ichituzitzu cha kupezya ichitima icha muntu yo akunyokela kunyuma. Iliso limo lyighalika, ukulangizya ukukatala kwache nu kughona utulo mu chikhristu chache. Iliso ilywamwabo likut-alangania nasita nsoni, nu kupanga ubumanyani ni chisu. Ubuzelu bwafita, ni vifwani mumoyo wache vyo vyalangiziyanga mo ipeleye ukuyimba poka nu Yeso vyamala nu kupalaghanika. Andukuwilamo bulo munjelo zyo zimuzyunguliye mubuyo bwa kuzichemela. Mubuyo bwa kwivva ivya Chala, andukwivvila vyo usatana mu buchevu bwache akusakizya nu kumulaghizya. Pobuli angaba achili akuya pa kwiputa, ukwifisa ku bubibi bwache munzwalo ya chikhristu, ulughano lwa Chala nalumomo mu moyo wache. Aba wa nyinong'ono zibili, atakumanya napo ali. Akwazya ni chisu, nu kwibika ngati wa Chala. Ulutondwa mu moyo wache, lo kokwilonga, lwazima. Impinjika yitanyamuliwe sona ni chimwemwe loli chaba ching'wamu chimo cho chitakulondiwa. Ulwitiko lwache Iwamala, nukukomana nu Chala mu nyiputo aleka. Atakwipasikizya namo umoyo wache ghubeleye, po amupa nkani umuyeli wache ufwasi uwa kwingilila napo ame kunzi. Akufwasa nkani po ali naba kunzi ukulusya po ali nabitiki abenecho aba Yeso.

Ukwituvya, ko muzimu wa nkukutembo, kwingila. Angaba aluvya ukuti akapokiwa mu chisa namu lughano lwa Chala po andukuba mukhristu wa kwikwezya. Ubuching'wela bwa kong'osya nu kwingila. Mungaba momu tubalilo tumotumo mwene ngati po ali naba chisu mo atakulonda ukuti bangati asyalikiye, pamo ate



6

6. UMOYO WA KUYELIWA NU KUGABINKANA

nulwangalo, nu satana akumubuzya akuti lyoka lyene litangananga ichikhristu chache. Inyinong'ono zyavya mubili poka ni vinyonywo vyache vyanda ukumuyivya. Angaba anda ukwilagha insunga zya mwalwe, nu kuhoboka leka ni vituzituzi vyat bukonyofu, nu kufwasa na bamanyani ababulo nu kwenda mumabuyo

gha kutyongela; mu vyakuhobosya amaso nu kwivwila he po usatana akuti atangikala bulo nukuti imbibi yoka yitanga belengiwa.

Tutangavilesya iviyuni vya mbibi nivya nyinong'ono imbibi ukubuluka pamwanya pamitu yitu, loli nanti tukuvyitikizya ukwikala nu kutenga ivifulumbo mumyoyo nu kutela imbonbo imbibi bo twananga. Nanti twamupa usatana akasamba ka panyobe, umwene akufyula inyobe yonsi nu kughukwesela umibili poka nu muzimu ukuya mu moto wa bwila. Po uChala akutusoka ukuti tuvichimbile ivinyonywa vya bunyamata (vya birlindu) nukuti tuta kangale nimbibi munzila yonsi yo zingizila. Chimbilila kwa Yeso, umupoki wa kufosya.

Umuntu yo akughulasa umoyo ni chipeni akwimilila bala bo bakuywelula nu kususya ichikhristu. Mu bulumaluma nu kususya kwabo bakulasa nu kuvulazya imyoyo ya bakhristu – ubwite bo umoyo wa kugabinkana għutangajimba. Akwanda ukunyila abantu ukulusya uChala pobo akunyila vyo abantu inti banene nu kubomba, aba muzya wa bantu nu kwepukila nzila kwa Chala. Ilaka ni lyoyo vyandukuboneka mu tubalilo twantamyo namu bupotwe. Injoka ya kabini yo yikuboneka nanti bamu vyandubendela bakukuba yakwefuka nu kwibilizya ukwingila, nanti yikulwagħha ulusako yikuleta ulubengo nu kwisubalila.

Chipepe leka ukuti ulughano lwa ndalamha lwingile mumyoyo yitu pene nanti tukwivwila ukusoka kwa Yeso Khristi po akuti, “Mubemaso nu kwiputa ukuti mutakawé mungelo” (Mat. 26 :41). “Chobene muleke yo akuti imite abemaso ukuti atakawé” (I baKol. 10 :12). Tukwenela ukuvwala ichilwilo chonsi icha Chala ukuti twime mwisiku ibibi (baEfe. 6 :11-18).

ICHITUZITUZI CHA SEVENI

Chikulingania namo yo awa akubela pakuti bo ubuzelu bwa-mwizila, ayezya ni chabupi cha kumwanya nu kwizula nu Muzimu uMuzelu, akiza awa. Chikulangizya sona namo yo atapindukite lumo akubela, yo atipiye lumo kwa Chala; pobuli izwi

lya Chala lyo likwitiziwa ukuba “Mazyu Amiza” lyamufika nu kuvumbuliwa kukwache. Umuntu yo akukazya umoyo wache po uChala akumulambilizya, akunangikila nzila pobuli angayezya leka ukwiyandula.

Kwayo awiye: UYeso akunena namo abeleye po akuti, “Nanti umuzimu umubibi wepa mwa muntu, ghukwenda mumabuyo mo mumite ukulonda pa butuzyo: Nanti ghutakupagha ghukuti, inti inyokele kunyumba yane inkali. Nanti ghukwiza nukwagha mupyeliwe nu kuswefiwa ghubuka nu kusenda imizimu imikali ukughulusya seveni, po yikwingila nu kwizukwikala: Po akabele ka muntu uyu akabumalilo kazukulusya naka pabwandilo” (Luka 11 :24-26). Po chabawila ngati momuchili cha naloli, “Imbwa yanyokela sona ku matapisi, ni ngulube yati yoziwa yaya sona pakwambala muvikata” (2 Petro 2 : 22).

Ichituzituzichi chikusandalula yo awiye mo abeleye poka nayo atakulonda ukupinduka. Imbibi mu bujanja bwache yiza sona pa kwikalala nu kulamula mu moyo. Na pamaso pache pa kulangizya mo umoyo wache ghubeleye. Inkunda ya Iwiyisyo, yo Muzimu uMuzelu, yafinyilisiwa ukwepamo mumoyo pakuti imbibi nu Muzimu uMuzelu vitangikala poka. Umoyo ghutangaba litempeli lya Chala nukuba chimpako cha satana akabalilo koka. Izwi lya Chala, umungelo, ichitima chikumukola bo akwepa chobene akuchebela kwisinda ukuti pamo angapinduka ngati mwana umusobi, “Yo akalonda he ukuti angikusya ulwanda lwache ni vimapeta vyo ingulube zikalyanga loli nayumo yo akamupa: Akiza iyaghania nukuti, inyamuke inje kwa tata injemubuzye inti, nanangila kumwanya sona nakunangila nuwe, po ntabaghiye ukwitiziwa sona ukuba ne mwana wako” (Luka 15 :18). Uwise, bo akwenia mo apindukiye, akamuhabokela nu kumupokela.

Umoyo ghutakulangizyapo nu kupinduka ukwenecho mu chituzituzi chino, atakulonda nu kwiza kwa Chala, atakulonde-lezya nu luhobokelo mu vinama vya Yeso. Ukwilonga kwache kulifwe kupembewe ni chela ichipye po kupumiye nzila. Ali na makutu loli atangivwa nu lumeme lwa Yeso, ali namaso loli atanngenia ichizozi cho chite na pabumalilo kusi ku vinama vyache. Ate ninsoni nu kukakatila mumbibi zyache. USatana akulamula mu moyo wache po ikaye ubumwene pa chitengo chache. Angaba



7

7. UMOYO UWAKUWA PAMO UMUKAFU

achili akuboneka mwiza sona wa kuchindikiwa, nu kuboneka mukhristu kunzi, ngati lipumpa iswepu “Loli mukasi mwizulanite imifupa yabafwe nu bunyazu bonsi” (Mateyo 23 :27).


Uwise wa bugulugulu asenda ubuyo bwa Muzimu wa Bwanaloli. Imbibibi yonsi, ivinyamana, yiza nimpepo inyali ni mizimu imi-

bibi. Pobuli akulonda ukwipoka ku mayimba ngati ghano, vichili vimukungiliye. "Yo akasulanianga ululaghilo lwa Mozesi aka-fwanga kwambula chisa pa bakamboni babili pamo batatu: Po mukuti angize apokele lufundo loni, mwinong'onepo, lo lungize lumuyanile yo akukanyila kuvinama uMwana wa Chala, nu kulpanga ibanda lya lufingo, lyo likamuswefya, ukuba lyabulo, nu kufuyania umuzimu wachisa?" (baHebri 10 :28, 29; 2 Petro 2 :1-14).

Nanti ichituzituzi chino chikuyana nu moyo wako we ulipa-kubelenga, kolela kwa Chala kwambula kuchedwa, ukufuma pansi pa moyo wako. "Ali na maka gha kukupokela," sona ipiye ukukuhobokela kumbibi zyako zyonsi, nanti ukwiza nu moyo wa kupinduka kwa naloli. Ali namaka ukumukungilila uSatana ni mizimu yache yonsi iyachisi nu kuvyefyamo mu moyo wako, pene nanti wipiye. Iza ngati wamambombo yo akiza kwa Yeso nukuti, "Nanti ukulonda, mpangako imbe akiza." UYeso akamula "Nkulonda, banga akiza" (Mk. 1 :40, 41). Loli nanti ukwendelela nu kukazya umoyo wako nu kughana ichisi ukulusya ubuzelu, tutakumanya, tutangakwaywa sona, pakuti wasala imfwa mubuyo bwabumi – "pakuti amalipilo gha mbibi mfwa" (baLoma 6 :23).

ICHITUZITUZI CHA EYITI

Pano tukwenia uwa lukani pamo yo akukazya umoyo aya pakufwa. Imfwa (ivimafupa) yiza akabalilo akabibi ko atakuyilonda. Ubuzale bonsi ubwa mumbibi bwa chimbila, po amanya ubwanaloli nu koghofya kwa malipilo gha mbibi gho aya pakukomana nagho. Ubusisya bwa kumoto buli nawe. Pobuli akulonda leka ukuti angiputa, akwagha ukuti atangivwana nu Chala yo mutubalilo utwinji akana ulughano lwache. Abamanyani bache bonsi bakunyla ukuba kupipi ni chitala chache, nu kusubazya kwabo kutakumwavwa ku kabalilo kano. Nu bukabi bwache bo lumo bwa munzila imbibi butanga mupoka sona butangonelezya ubumi bwache; nukuti butangachefya amayimba ghache. Usatana atakumupa ulusako lwa kwinong'onela vyo vya Chala pobuli andukumulonda leka.



8. UBUMALILO BWA WAMBIBI


Vyosi vyo akavighana nu kwikalila vikuba ngati vikumobezya, nayo mudimi wache umusita kupinduka atangamwawwa ku kabalilo kano, pakuti afuyania ulughano lwa Chala nkuwilila mu lufundo lwa ndaghilo. Andukuzyaghania ukuti “Chintu cha koghofya ukuwilila munyobe zya Chala umumi” (baHebri 10 :31). Akatingi ayukwiza kwa Chala pisiku limo muntazi pamo pamfwa yache, loli pano aghukuti akabalilo kamumalila. Abantu abinji

pakufwa bakunyela bulo bo bachili batipiye kwa Chala pamfwa yabo. Chobene chikulondiwa ukumulondeleya uChala po achili angaboneka. Mubuyo bwa kwivwa amazyu gha Chala aghabupoki na ghakwisya umoyo, umuntu wambibi yo akafuyania ulughano lwa Chala ni chisa chache bo mumi abaghiye ukwivwa izwi lya mulongi wache, umupoki yo akamukana, akuti, “Fumako ku-kwane, we mughuniwa mu moto wa bwila gho tukapembela usatana nabangelo bache” (Mateyo 25 :31). “Chipegawaiwe kwa muntu ukufwa lyoka, ukufuma apo bulongi”(baHebri 9 :27).

ICHITUZITUZI CHA NAYINI

Ichi chikulangizya u mukhristu yo imite nu kuzipota ingelo impalapala. Pobuli akuyeliwa umu numu, achili akudaga mpaka kubumalilo, akufosezya mwa Yeso Khristi. Atingiye bulo mu lwendo lwa chikhristu, loli akuyimbilamo. Atakupupuluma pamo ukuchebela kumongo na kundilo loli “kwa Yeso ubwandilo nu bumalilo bwa Iwitiko Iwitu” (baHebri 12 :1, 2).

Usatana ni mizimu yache yonsi vimuzyunguliye, ukuyezza umu numu ukumupuvya umwana wa Chala. Ulwituvyo, ulughano lwa ndalamu, umuzimu wa buhule nivinji vikumuyela. Mubuyo bwazyela tukwenia impunda, pakuti utubalilo utwinji imbibi yikwiza umwa kupambanapambana nu kuvvamila mwizina ilinji. Loli umukhristu yo alimaso akuyimanya napo yingizila munzwalo ya chikhristu pamo ngati mungelo wa buzelu, pakuti Izwi lya Chala nu mizimu wa bwanaloli vikumulongozya ku bwanaloli bonsi. Umuntu yo alemite ukomeji wabwalwa munyobe, akwimba nu kumuzyungulila ukuti amukope nivya chisu. Loli angala bulo kwa mukhristu uwakwipa papo akome-liwe poka nu Khristi kumbibi naku chisu. Umuntu uwabubili akumulasa umukhristu ni chipeni. Ineno imbibi, ubulumaluma, isusya nu koghofya kwakufumila ku balwani ba Chala – utubalilo utwinji ukufumila mubo bakuti bapokiwe – vikulasa umoyo wamupokwa umwenecho. Loli kuvyo abantu banganena mufwe, nukuba nimbombo navyo uChala akumubuzya. Amazyu gha Yeso akughakumbuka: “Mwe basayiwa mwe, po abantu bakuba-susya nu kubayivya nu kubalyeghela ububibi bonsi chifukwa



9. UMOYO WA KUFOSYA

chane. Muhoboke sona mwizule nu lusekelo, pakuti amalipilo ghinyu kumwanya makulu leka” (Mateyo 5 :11, 12).

Imbibi, umubili (ne nene) nu satana vikuyezya leka ukumupangula umukhristu ku lughano lwa Chala. Loli mu lwitiko ulwa

kufikapo akunena nu buhobosu ubukulu ukuti "Wenu yo angampangula ku lughano lwa Khristi? Amwe intamyo, pamo amayimba, pamo ukunenenkeziwa, pamo inzala, pamo insimbi, pamo ukuba mu bulughu, pamo ivilwilo?" (baLoma 8 :35). "Ha we, muvyosi vinivi twalusya naba kufosya ukwendela mwayuyo yo akanda atughana" (Baroma 8 :37). Bo avwala ichilwilo chonsi icha Chala, abaghiye ukwima mwisiku ibibi nu kuzipotela ingelo mwa Yeso Khristi, yo akafosya ingelo nu kuyeliwa konsi, ukuti mumwache tuye tufosye nu kupokela impumpu inchindikiwa.

ULUTONDWA lwa kwilonga kwache lulamite leka. Mu moyo wache mwizuye ulwitiko nu Muzimu uMuzelu. Izwi lya Chala, lya mungelo, likumukumbusya vyo vikuya kubo ba kufosya nu kwima mpaka ku bumalilo. "Kwayo akufosya, nkuyumupa ikwi lyabumi lya limelite mu mughunda wa Chala ize alye." "Yo akufosya inti akalye umana yo afisiwe, nkuyumupa nibwe iswepu nukuti mwibwe munumo nkuyukusimbamo izina ipya." "Nayo akufosya nu kubomba imbombo zyane mpaka ku bumalilo, nkuyukumupa amaka." "Yo akufosya weyo nkuyukumuvwika umwenda umuzelu, ni zina lyache te nkalizimye mwibuku lya bumi, loli inti nkalinene kwa Tata naku bangelo bache." "Yo akufosya nkuyukumupanga abe lipanda mwi tempeli lya Chala wane, po te akafumile lumo kunzi." "Kwayo akufosya inti nkamubike twikale nawe mu chitengo chane, ngati mo nkafosezya po nikaye nu **Tata** wane mu chitengo chache" (Ubuset. 2 :7, 11, 17, 26;3 :5, 12, 21).

INYAMBI YA NDALAMA INYIGHULE yikulangizya ukuti te moyo wache wene ha, loli ni ndalama zyache azibikite mwa Chala. Mubuyo bwa kunangania bulo ichuma chache, akwawwa abapina, akubika ichigaba cha teni (tithe) nu kusopa kwa Chala lumo vyosi vyo ali navyo, ukuvibombela vyosi pa kutuvya uChala.

ICHIBAMA NINSWI vikulangizya ukuti akwikala ubumi bwa kwitikiziwa. Atakwinyazya nivyakung'wa ivya kukola, pamo ukulya ivyibanda pamo vyo vyanyaziwa pamo chonsi cho chakulya ichibibi. Atakukomania indalam, pamo ukunyazya umubili wache (lyo litempeli lya Chala) pa kulya nu kukweba lyonsi

lyo litumba, sona atakubombela amapilisi ni milembo imibibi loli akulya ivyakulya ivyiza ivya kwikusya. Umoyo wache lite mpeli. Akuya ku chalichi utubalilo tonsi napo kunzi kungabipa pamo abe muntamyo. Ighanite leka ukwiputa ku chalichi, mu chipinda chache, ni mbumba yache poka, pakuti amenye ukuti umukhristu atangikala kwambula kukomana nu Chala mumputo.

IBUKU ILYIGHULE likulangizya ukuti ibangeli kukwache lyighule, akulibelenga nu kwavwiwa isiku nisiku, ukukaba amaka na mahala, ubuzelu nu bumi, ubukabi ubusita kuneneka. Lyaba nyale ya kuvinama vyache nukuba chilwiло cha kumupotela umulwani. Chibama cha muzimu chisiku nisiku ku moyo wache, mizi gha kuzimizya inyota, lozyo lwa koghamo nukuba li galasi ly a kwiyenezya.

Anyamuye impinjika nu buhobosu pakuti amenye ukuti kwambula mpinjika, impumpu nayimo. Pakuti amenye ukuti azyuka nu Yeso kubumi ubupya, akulondelezya ivintu nya kumwanya, vyo vitakumala pobuli vitakuboneka. Isenganizye ukukomana nu Chala, po ali ngati likwi lyo libyaliwe kumizi nukwela mu kabalilo, ngati chisamba cho chikwela nkani icha chibyaliwa ichenecho. Ukunyla imfwa atakumenye, pakuti ulughano lwa chala lo apokela mu Muzimu uMuzelu, Iwizula mu moyo wache.

ICHITUZITUZI CHA TENI

U Yeso akati, “Ne kuzyuka sona ne bumi : Wensi yo akunitika, napo angafwa, pope azukuba mumi. Na wensi yo ali nubumi inga anitikite te akafwe lumo” (Yohani 11 :25, 26). “Wensi yo akwivwa izwi lyane nu kumwitika yo akantuma, ali nubumi bwa bwila, pote akalongiwe, loli epuka kumfwa aya kubumi” (Yohani 5 :24). Kwa mukhristu, imfwa yitakoghofya sona yitakuyivva. “Imfwa ya miliwa mu bufosye. Wemfwa we, akabolelo kako kali kwiyi? We lipumpa we, ubusisya bwako bulikwiyi? ... Achindikwange uChala witu yo akutupa ubufosye mwa Yeso Khristi” (1 baKor. 15 :54-57).

Umuntu yo akwenda nu Chala atakunyla imfwa. Nanti isiku



10

10. UKUBWELA KWA BUSAMBE

lya kubukila lya kwanila, akubuka umwakufwasa ngati mo uPauli akunenela, “nasamba ukwepapo nukuya kwa Yesu, *papo cho chizapo*” (baFili. 1 :23).

Umukhristu ali ninyota ya kwenania nu Yeso, yo akamufwila pa mpinjika nu kumupoka. UMuzimu uMuzelu ghu kumukumbusya amazyu gha Yeso, “Mutakapasyange mumyoyo yinyu, uChala mumwitike, nune bulo munitike. Mu nyumba ya Tata

ubuyo bukulu, nanti butakabangamo nge nababuzya. Nabuka pa kubayanizya ubuyo. Nanti naya nasengania nkuyukwiza sona nu kubasenda ukuti ko indi ko numwe mwize mube: inzila iya kubukilako muyimenye kale” (Yohani 14 :1-4). “Iliso litenizye nikutu litivuye, namumoyo wa muntu vitingiyemo, ivintu vyo uChala abasenguliye bo bamughanite” (1 baKor. 2 :9). Ineno yitalipo nayimo pachisu iyakuti yingalingania ubuchindamu bwa buyo bwa kumwanya bo bakubayanizya bala bo bakwenda munyayo zya mwene witu uYeso Khristi pachisu pano. Mubuyo bwamifupa iyakoghofya (imfwā), umungelo pamo intumi ya Chala yili muchituzituzi chino. Akulindilila ukughusenda umuzimu waku-fikapo nukuya nagho kwa Chala. Umuzimu wabuliwa ku mibili nu kwingila pa mulyango umwighule mpaka kuvipakato vyayo umoyo wache wa mughanite nu kumufwila pachisu. Ukupokeliwa ku kumulindilila pamaso pa Chala po akulumbiwa nu mupoki wache namazyu gha mapalo ngati ghano, “Wabomba, we mubombi umwiza sona umusubiliwa, ingila mu busambe bwa mwene wako” (Mateyo 25 :21). Usatana ate namaka sona papache, pakuti “ichakuhobosya kumaso gha Yeso Khristi yomfwa ya baghaniwa bache” (Masal. 116 :15). “Po nkivva izwi ukufuma kumwanya likunena, simba, Basayiwa abafwe bo bakufwila mwa Yeso ukufuma ilelo: Inga, uMuzimu ghukunena, ukuti bize batuzye kuntamyo zyabo, ni mbombo zyabo zikubakonka” (Ubuset. 14 :13).

UKUSOKA KWA BUMALILO

Kwa we mubelengi, uChala akwawve ukuti umupe umoyo wako yo akughanite, papo lonsulu akukulambiliza akuti, “Mwana wane, mpanga umoyo wako” (Ivyili 23 :26). Mupe uYeso umoyo wako umulite gho wizuye nivya kupezya ubukata, umoyo wa vyakubaba, ukuti akupe umoyo umupya poka nu muzimu umupya. Utakazimbuliwe nu bujanja bwa moyo wako nu kukonka vyo ghukulonda, papo “Yo akusubila umoyo wache mulunkanu: Loli yo akwenda mu bwanaloli yo azukupokwa” (Ivyili 28 :26). Kolelesya u bugholosu nu kuzileka imbibi zyako zyonsi papo “Amalipilo gha mbibi mfsa, loli ichabupi cha Chala bumi bwabwila mwa Yeso Khristi” (Baroma 6 :23).

Kwawe wipa umoyo wako kwa Chala, “vyo vivva kolelesya

ukuba chimanyisyo ichenecho mu lwitiko namu lughano lwamwa Yeso Khristi” ngati mo uPauli akunenela mu 2 baTim. 1 :12, “Mumenye yo mwitikite po ndi nubwanaloli ukuti abaghiye ukunsungila kala ko kane mpaka pisiku lila.” Izenga mu lwitiko ulwenecho, wipute mu muzimu sona wendelele mu lughano lwa Chala bo ukwenia kwa Yeso inzila, ubwanaloli nu bumi, umwene witu yo akwiza lunulu pa kusenda abache – “Umwene wa bmwene sona umupoki wa bapoki.”

“Kwayo abaghiye ukukusungilila ukuti utakawe nu kukwimika pabuchindamu bwache kwambula kabibi nakamo muchimwemwe ichikulu, kwa Chala witu weka uwamahala, umupoki witu, kube umuchizi, ubumwene, amaka nu bulongozi, ukwanda ilelo mpaka bwilabwila swi. Amen” (Yuda 1 :24, 25).

Kuli ichisu ichiza leka
Ko kuli utata wane,
Umupoki wane koko abukite,
Nune nsambiteko leka.

Chorus:
Nkulonda ukuyako,
Ukuti inje imbe nu Yesu wane.
Nkulonda ukuyako,
Ukuti inje imbe nu Mwene wane.

Ivyiza vyinji leka pansi,
Loli kwa mwene wane kula,
Kukulusya ivyiza vyonsi,
Chobene nsambiteko leka.

Naloli umutende winjiko,
Nu kuzala poka nawe,
Mu lughano ulwenecho,
Popo nsambiteko leka.

Bo bamenye ivyenecho,
Bobo bakumwenia umupoki wane:
Bakwanduka ukuba bazelu,
Po une nsambiteko leka.

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.anqp-hb.co.za or as an APP "Heart of Man" on Android phones.

Le livre du "Coeur de l'homme" peut etre obtenu en plus de 538 langues et dialectes parles dans le monde entier, a savoir: Afrique, Amerique, Asie, Extreme Orient, Europe. Notre Livre du Coeur est maintenant aussi disponible sur votre Telephone cellular, plaques, etc. de www.anqp-hb.co.za ou comme une Application "Heart of Man" sur telephones Android.

Este livro "O Coracao do Homem" e obtfdo em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem tambem esta agora disponivel em telefone celular, tablets, etc. de www.anqp-hb.co.za ou como um aplicativo "Heart of Man" nos telephones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent etre obtenues en tableaux de couleur, format 86 x 61 cm, avec des physionomies europeennes ou africaines. Ils peuvent etre utilises en meme temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracteristicas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradeciamos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras linguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faça o favor de nos

informar. Pois nos gostarfamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuitamente a literatura evangelica, livros e folhetos em mais de 538 linguas diferentes escreva para:

E-MAIL: info@angp-hb.co.za
info@angp.co.za

ALL NATIONS GOSPEL PUBLISHERS
P.O. Box 2191
PRETORIA
0001
R.S.A.

A Gospel Literature Mission financed by donations

Une Mission de litterature evangelique financee de dons
Missao de literatura Evangelica financiada por donativos

(Reg. No. 1961/001798/08)